

MISHIKAMAUNNU

Etuat Rich

Puamu ne napeu, utanisha nenua uitshimeu, nipinua nekani utishkuema, puamu.

— « Nika uitshimau tshitanish », ka-nitikua, ishinueu innua.

Ek^u eka nitapuetuaua, nitanish, iteu.

Utanisha nenua tipatshimushtueu nenu eshinak.

— Ek^u eka nitapuetuaua, iteu. « Ek^u tanite tshitshue niminuatau tshitanish, nika uitshimau iapit eka minini », ka-nitikua, nitishinuau. Eukuan ma ne nitanish, ka-tshitshitaussutshipanaua, tshitishinatin, massekut. Eukuan ne ua uikutshitan, muk^u aiat atamassut nete ka-tshititanaua, tshitishinatin, iteu. « Eukuan ma ! » eishinatan ka-tshitishinaua, tshitishinatin. « Nimetshikunikutak anite auen nishkatit ut kie nuapatamuan nenu utitshi, anite ut shatshipanitau kie nenu utashtamik^u, miam akaneshau eukuan eshinakushit, uapishiu », ka-tshitishinaua, iteu.

Tapue nenu ma katshi nenua akaneshaua ui tutakut, tshinitshinikuanitshimeu nenu Mishikamanu. Anite miam ua kapati, ekute anite nepaiakanniti atikua, anutshish nenua shuk^u nipinua mani. Muk^u ekue akuashitapet kanapua mani. Katshi manukashuti ek^u uanatikuet ek^u matshishut kanapua mani. Minuat eshpish tshitamuati, minuat ekue pushit mani.

Tshek ma e manashtet utin ne ishkuess, ui tashkamassekaim^u – nenu masekussinu anite takuannu – ekue tshitaussutshipanit. Ekue uapatak mititshinu uetshipitikut – nasht nenu uapanu mititshinu – kie nenu utashtamikunu uapatamueu nenu. Tshishennu tekushinit, shash nana tshitaussutshipannua utanisha, ekue natat. At ua uikutshiat, muk^u aiat atamassut tanua.

— Nuta, itiku, eka nutshii ekush, eukuan tshe ishinakushian ek^u, eukuan nui ishinakushinatshe.

— Eshe, iteu.

Shash apitu ishkussuenua, nenu ma nekatat. Uiapannit at netuapamat utanisha, apu taniti. Ek^u pieikussit. Muk^u eukuan etit : anite kepati, anite atikua shiessishinniti, anutshish nenua shuk^u shessipitakannua, ek^u muiatiku et kanapua mani.

Ek^u eshpish tat ma anite, tshek ekue uapamat utanisha, nete minishtikut ishitshimeu. Ekute anite uiapamat utanisha – uitapimenua napeua – ek^u niatauat. Pieshuapamat, ek^u apu taniti nenua utanisha. Nasht nishtuapameu eukuannua utanisha. Uitapimenitaka napeua, uapishinua nenua napeua uatapimaniti. « Tapue eukuan nitanish, tapue tshi utinikushapan shash », itenimeu.

Minuat nenu napinnit anite eshpish tat ekue ishitshimet anite ka uapamat utanisha. Eukuannu uiapamashit ek^u, ussimisha takunakanishinua, takuneshu nenua utauassima ne ishkueu. Eukuannua utanisha, nasht nishtuapameu. Ek^u at niatati, ua natshi-uapamat, ek^u apu uapamat pieshuapamati.

Eukuan nenu Petshishkapishkau ka ishinikatet, eukuannu nenu uatshiniti itakanu. Eukuan uet eka tapuetakanit tshetshi atuaikanit : matshi-tshishikau etuaikaniti inanu Petshishkapishkau.

Shash.